

**TRIBUNA POLITICA**

# Tge fa atgnamain la conferenza da las regenzas chantunalas (CdC)?

DA BARBARA JANOM STEINER  
CUSSEGLIERA GUVERNATIVA

Il 8 d'october 1993 è vegnida fundada la conferenza da las regenzas chantunalas (CdC). Quai cun la finamira da promover la collavuraziun en champs da competenza chantunals sco er en chausas federalas ch'èn relevantas per ils chantuns e da garantir la coordinaziun necessaria sco er l'infurmaziun per mauns dals chantuns. Da la CdC fan part las regenzas da tut ils 26 chantuns. L'organ da decisiun suprem è la radunanza plenara, nua che mintga chantun ha in sez ed ina vusch. La vusch dal Grischun dastg jau far valair en il comité directiv sco er en la radunanza plenara.

La CdC sa fatschenta principalmain cun la renovaziun e cun l'ulteriur svilup dal federalissem, cun la repartiziun da las incumbensas tranter la confederaziun ed ils chantuns, cun la furmaziun da la voluntad e cun la preparaziun da las decisiuns en la confederaziun, cun l'execuziun d'incumbensas federalas tras ils chantuns sco er cun la politica exteriura e cun la politica d'Europa.

En il center stattan actualmain cunzunt duas grondas tematicas. Las tractivas davart las cunvegns



bilateralas cun la UE sco er dumondas da la realisaziun, en spezial la realisaziun da l'iniziativa «Cunter l'immigraziun da massa» resp. la regulaziun da l'immigraziun.

Il segund tema central è la gulivaziun da finanzas naziunala tranter la confederaziun ed ils chantuns che gida a reducir las differenzas finanzialas tranter ils chantuns e ch'è ina basa centrala per ina concurrenza gista tranter ils chantuns. Ils chantuns èn vegnids a la conclusiun che la nova gulivaziun da finanzas saja da princip sa cumprovada. A medem temp han els decidì d'examinar differents propostas da meglieraziun per sviluppar vinvant la gulivaziun da finanzas ad in sistem general coherent e per optimar la gulivaziun da finanzas.

Ina gruppa da lavur politica ha elavurà ina proposta correspondentia cun

pliras recumandaziuns, e la gulivaziun da finanzas duai vegnir rinforzada sco pitga impurtanta dal federalissem. La proposta porta avantatgs per tut las varts participadas: Ils chantuns cun paucas resursas pon quintar cun ina dotaziun minimala garantida, entant ch'ìls pajaments dals chantuns cun fermas resursas e da la confederaziun dependan mo pli dal basegn da gulivaziun e betg pli d'altres influenzas. La regulaziun da la gulivaziun da las resursas pudess uschia vegnir distgargiada da cuntradiziuns e da discussiuns politicas. Cun questas propostas vulesch la conferenza da las regenzas chantunalas (CdC) sche pussaivel persvader tut ils chantuns per in'optimaziun da la gulivaziun da finanzas. Questa finamira è dentant cuntanschibla mo cun in'avischinaziun dals chantuns cun bleras resursas e dals chantuns cun paucas resursas.

Las propostas da la gruppa da lavur èn vegnidas preschentadas e discutadas per l'emprima giada a chaschun d'ina radunanza plenara extraordinaria da la CdC. Ellas èn uss en consultaziun tar ils chantuns, e la finamira è quella da fixar – a chaschun da la radunanza plenara dals 24 da zercladur 2016 – ina posiziun cuminaivla. Ins dastga pia spetgar cun tensiun...